



# SIARAN AKHBAR

KEMENTERIAN KESIHATAN

## PERUTUSAN

YANG BERHORMAT  
DATO SERI SETIA DR HAJI MOHAMMAD ISHAM BIN HAJI JAAFAR  
MENTERI KESIHATAN  
SEMPENA MINGGU IMUNISASI SEDUNIA 2024

24 - 30 APRIL 2024

TEMA:

*“Humanly Possible”*

1. Pada tahun ini Negara Brunei Darussalam, sekali lagi bersama dengan negara-negara ahli Pertubuhan Kesihatan Sedunia yang lain, menyambut Minggu Imunisasi Sedunia yang disambut setiap tahun pada 24 hingga 30 April 2024. Minggu Imunisasi Sedunia disambut untuk mengingatkan orang ramai tentang peranan vaksin dalam menyelamatkan nyawa dan melindungi orang ramai dari semua peringkat umur daripada penyakit dan kecacatan.
2. Seperti lazimnya, sambutan Minggu Imunisasi Sedunia disambut dengan tema yang tertentu setiap tahun. Bagi tahun 2024, Minggu Imunisasi Sedunia disambut dengan tema ‘Humanly Possible’, sebagai peringatan tentang kemajuan yang telah dicapai oleh manusia dalam menjaga kesihatan global melalui vaksin untuk mencegah penyakit-penyakit.

3. Program Pengembangan Imunisasi (Expanded Programme on Immunisation / EPI), adalah satu inisiatif yang dilancarkan oleh Pertubuhan Kesihatan Sedunia pada tahun 1974, sebagai usaha global untuk memastikan akses yang saksama kepada vaksin yang menyelamatkan nyawa untuk setiap kanak-kanak, tanpa mengira lokasi geografi atau status sosioekonomi mereka. Tahun 2024 juga merupakan ulang tahun ke-50 Program Pengembangan Imunisasi, di mana pencapaian Program Pengembangan Imunisasi dan impaknya terhadap nyawa-nyawa yang telah diselamatkan melalui imunisasi rutin, sepanjang lima puluh tahun kebelakangan ini, adalah sebagai peringatan kepada orang ramai tentang manfaat program imunisasi sebagai satu intervensi awam yang kos efektif dan penting bagi melindungi orang ramai daripada penyakit berjangkit. Pada penubuhannya, Program Pengembangan Imunisasi memfokuskan kepada perlindungan kanak-kanak daripada 6 jenis penyakit kanak-kanak, termasuk batuk kering (Tuberculosis), difteria (Diphtheria), kancing gigi (Tetanus), batuk kokol (Pertussis), polio (Poliomyelitis) dan campak (Measles). Pada masa ini, jumlah imunisasi telah meningkat kepada 13 vaksin sepertimana yang disyorkan secara universal sepanjang hayat.
  
4. Di atas komitmen yang berterusan daripada Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam, Program Pengembangan Imunisasi Kebangsaan (National Expanded Programme on Immunisation) Negara Brunei Darussalam telah berjaya menyumbang kepada status

Negara Brunei Darussalam sebagai salah satu negara yang diisyiharkan bebas dari Malaria oleh Pertubuhan Kesihatan Sedunia pada tahun 1987; bebas dari Polio pada tahun 2000, bebas dari Measles pada tahun 2015 dan bebas dari Rubella pada tahun 2018.

5. Alhamdulillah, di Negara Brunei Darussalam, kita sangat beruntung kerana semua rakyat dan penduduk di Negara ini dapat menerima perkhidmatan vaksin daripada Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam melalui Kementerian Kesihatan. Program Imunisasi Kanak-Kanak Kebangsaan Negara Brunei Darussalam telah mencapai dan mengekalkan kadar liputan imunisasi kanak-kanak di tahap yang melebihi 95% liputan setiap tahun. Pencapaian ini membuktikan bahawa Program Pengembangan Imunisasi Kebangsaan dan inisiatif pemberian vaksin di Negara ini adalah berkesan dan sangat penting dalam memberikan perlindungan atau pencegahan seawalnya bukan saja kepada seseorang individu tetapi juga kepada individu-individu di sekelilingnya seperti ahli keluarga dan masyarakat.
6. Walau bagaimanapun, di sebalik kejayaan Program Pengembangan Imunisasi di tahap global, masih terdapat cabaran dalam akses dan pengambilan vaksin yang boleh mengancam kesihatan dan kesejahteraan berjuta-juta orang, terutamanya dalam komuniti yang kurang mendapat akses kepada perkhidmatan perubatan.

7. Dalam meraikan Minggu Imunisasi Sedunia 2024 ini, Kementerian Kesihatan akan terus komited dan berusaha untuk mengukuhkan lagi perkhidmatan imunisasi di Negara Brunei Darussalam bagi seluruh penduduknya yang merangkumi setiap peringkat umur, serta memastikan impak vaksin terus membawa kita lebih dekat dengan dunia yang bebas daripada ancaman penyakit yang boleh dicegah.

**-TAMAT-**